

VENDIM
Nr. 96/2014

**PËR KRIJIMIN E KOMISIONIT TË POSAÇËM PARLAMENTAR PËR REFORMËN
NË SISTEMIN E DREJTËSISË**

*(ndryshuar me vendimin nr. 67/2015, datë 28.5.2015; nr. 78/2015, datë 16.7.2015; nr. 107/2015, datë
17.12.2015; nr. 55/2016, datë 22.7.2016)*

(i përditësuar)

Në mbështetje të neneve 77, pika 1, dhe 78 të Kushtetutës, si dhe të nenit 24 të Rregullores së Kuvendit, me propozimin e një grupi deputetësh,

KUVENDI
I REPUBLIKËS SË SHQIPËRISË

VENDOSI:

I. Ngritjen e Komisionit të Posaçëm Parlamentar për Reformën në Sistemin e Drejtësisë.

II. Komisioni i Posaçëm ka për objekt të veprimtarisë së tij:

- Analizimin e gjendjes aktuale të organizimit dhe funksionimit të sistemit të drejtësisë, me qëllim evidentimin e problematikave dhe nevojave për përmirësim, në bashkëpunim me Ministrinë e Drejtësisë, dhe diskutim gjithëpërfshirës me institucionet e sistemit të drejtësisë, ekspertët vendas dhe ndërkombëtarë, subjektet e tjera të interesuara dhe opinionin publik.

- Hartimin e një dokumenti strategjik për objektivat e reformës në sistemin e drejtësisë, bazuar në analizën e gjendjes aktuale të organizimit dhe funksionimit të sistemit të drejtësisë.

- Propozimin për miratim të një pakete të plotë projektligjesh të nevojshme për reformimin e legjislacionit, që rregullon organizimin dhe funksionimin e institucioneve të sistemit të drejtësisë, përfshirë ato kushtetuese, e hartuar me kontributin dhe mbështetjen e institucioneve të sistemit të drejtësisë, ekspertëve vendas dhe ndërkombëtarë, subjekteve të tjera të interesuara dhe opinionit publik.

III. Komisioni i Posaçëm përbëhet nga 10 anëtarë, nga të cilët 5 janë përfaqësues të shumicës parlamentare (4 PS dhe 1 LSI) dhe 5 të pakicës parlamentare (4 PD e 1 PR). Emrat e anëtarëve të tij përcaktohen me vendim të Kuvendit.

IV. Kryetari i komisionit është përfaqësues i shumicës parlamentare dhe zëvendëskryetari është përfaqësues i pakicës parlamentare.

V. Komisioni i Posaçëm do të zhvillojë veprimtarinë e tij deri në fund të muajit dhjetor 2016. Në rast nevojë, me kërkesë të arsyetuar të komisionit, Kuvendi mund të vendosë zgjatjen e afatit të ushtrimit të veprimtarisë së komisionit.

VI. Komisioni i Posaçëm organizon dhe zhvillon veprimtarinë e tij mbështetur në dispozitat e Rregullores së Kuvendit për funksionimin e komisioneve parlamentare. Përfshirë, në rastet e mungesës së kuorumit, mbledhja e Komisionit zhvillohet me praninë e njërit prej anëtarëve zëvendësues. Përfshirë, në rastet kur rezultati i votimit është i barabartë, vota e Kryetarit të Komisionit është vendimtare, duke respektuar në çdo vendimarrje standardet ndërkombëtare të transparencës e gjithëpërfshirjes, në konsultim me ekspertizën ndërkombëtare, përfshirë dhe Komisionin e Venecias.

VII. Pranë Komisionit të Posaçëm ngrihet dhe funksionon grupi i ekspertëve vendas dhe ndërkombëtarë.

Në cilësinë e ekspertëve ndërkombëtarë, komisioni do të ftojë të marrin pjesë përfaqësues të Komisionit Europian (Misioni Euralius), të Shteteve të Bashkuara të Amerikës (USAID/OPDAT), të Këshillit të Europës (Komisioni i Venecias), të Prezencës së OSBE-së dhe të misioneve të asistencës për çështjet e drejtësisë të përfaqësive diplomatike në Tiranë etj.

Numri dhe përbërja e grupit të ekspertëve përcaktohen me vendim të komisionit. Komisioni mund të ftojë për konsultime për çështje specifike edhe ekspertë të tjerë ndërkombëtarë të mirënjohur në fushat përkatëse.

VIII. Pranë Komisionit të Posaçëm, në mbështetje edhe të grupit të ekspertëve vendas e ndërkombëtarë, ngrihet dhe funksionon sekretariati teknik, i përbërë nga këshilltarë/specialistë të Shërbimit Juridik të Kuvendit, Ministrisë së Drejtësisë, juristë të institucioneve të tjera shtetërore, si dhe juristë të tjerë me përvojë që do të ftohen të kontribuojnë si pjesë e kësaj strukture.

IX. Komisioni i Posaçëm në veprimtarinë e tij:

- Do të zhvillojë konsultime, seanca dëgjimore dhe diskutime me:

i) Ministrinë e Drejtësisë dhe institucionet e saj të varësisë;

ii) organet përfaqësuese të institucioneve të pavarura kushtetuese dhe institucioneve të tjera të sistemit të drejtësisë;

iii) ekspertë të fushës;

iv) përfaqësues të organizatave ndërkombëtare që mbulojnë çështjet e drejtësisë;

v) përfaqësues të shoqërisë civile.

- Do të mbledhë informacione nga opinioni publik nëpërmjet një portali online, të krijuar posaçërisht për këtë qëllim.

- Do të organizojë debate publike në media etj.

X. Për çdo element të objektit të veprimtarisë së tij, Komisioni i Posaçëm do të organizojë, në bashkëpunim me Ministrinë e Drejtësisë dhe nën kujdesin e Presidentit të Republikës, tryeza pune gjithëpërfshirëse me institucionet e sistemit të drejtësisë, ekspertët vendas dhe ndërkombëtarë dhe subjektet e tjera të interesuara.

XI. Çdo parti tjetër joparlamentare, që nuk është e përfshirë në këtë komision, ka të drejtë të bëjë propozime pranë komisionit.

XII. Ngarkohet Sekretari i Përgjithshëm i Kuvendit për krijimin e kushteve të punës, mbështetjen financiare e logjistike të veprimtarisë së këtij Komisioni të Posaçëm, grupit të ekspertëve dhe sekretarisë teknike.

XIII. Ky vendim hyn në fuqi menjëherë.

KRYETARI
Ilir Meta

Miraturar më datën 27.11.2014